




ル 5
3150
4



門 5
3150
卷 4

黔南識略卷四

安順府

貴州巡撫長白愛必達撰

安順府在省城西南一百九十二里禹貢梁州外境
秦爲夜郎地漢屬牂柯郡晉爲興古郡地唐爲戎州
都督府所屬盤州及羅甸國地宋爲普里部元置普
定府及習安等州至元中改爲羅甸宣慰司未幾卽
廢大德七年改府爲路隸雲南行省明洪武十四年
復改路爲府其治在今城南四十里十六年改爲安
順州隸四川正統元年改隸貴州布政司成化中徙

州治於普定城萬歷二十年陞爲安順軍民府

國朝因之康熙二十六年裁軍民字領郎岱同知歸化通判二廳鎮甯永甯二州普定安平清鎮三縣屬貴西兵備道管轄設知府一教授一訓導一經歷一巡檢一分駐羊場司其境東至貴陽府貴筑縣界一百四十里西至興義府安南縣界一百七十里南至興義府貞豐州界一百里北至大定府平遠州界七十里東南至貴陽府廣順州與貞豐州界四百里西南至興義府安南縣界四百五十里東北至大定府黔西州界四百里西北至大定府界三百六十里廣三

百一十里袤一百八十里由治東一百九十二里至省城七千八百二十里達於

京師山川扼塞民夷輻輳襟帶楚粵控制滇蜀明洪武中命傅友德等征雲南自辰沅入普定分據要害乃進兵曲靖平滇之功實始於安順也其城周九里三分高二丈五尺明洪武十四年置普定衛時建今修甃以石門四城北有北山發脈於雲南宣威經威甯石龍山歷水城而來盤江界其西三岔河衛其北又自郡折而南分南北兩枝南枝由舊安順州經定番都勻黎平以入楚粵北枝由安平清鎮至貴筑之

老鴉關爲黔之會城郡治其榦之脊也由府治東八
十里爲楊家關兩山夾峙中通一路最爲險要西一
百四十里有關索嶺爲滇黔之鎖鑰城西一百二十
里有撻鐵關爲新開驛路行者必穿石峽中而後過
塔山在城南隅卽古大風洞元泰定二年建塔其上
叢林翳蒼郡中勝境東勝山在城東一里西秀山與
東勝對峙飛虹山在城東五里傳爲明惠帝棲託之
所巖孔山在城東十五里山腹有穴可容萬人屏風
山在城南二里馬首山在城東南三十里新坡在城
西北二里嶺長五里郡治形勝舊城在城西北二里

又名馬頭山兩山並峙中有石關紅土坡在城西南
三里土色如硃又西南十里有黑土坡土色如墨石
笏峯在城東五里羣山惟此最高白石巖在西堡司
西南山甚險峻上有泉苗人依此爲砦歡喜嶺在城
北二里明洪武中蠻賊攻城指揮顧成大破之名以
記喜清涼洞在城東二十里又名糧倉洞天開一竅
前後通明傳孟獲曾屯糧於此華巖洞在城南十五
里石乳嵌空濕雲滴瀝龍潭洞在城東北五里洞極
深廣潭在其中水氣惛人不可近有天生橋爲禱雨
之所楚油洞在西堡司東南六十里高萬仞盤亘三

百餘里洞在山半深廣亦百餘里又有老鴉洞深不可測碧波橋河在城東甯穀橋河在城南九溪河在城東南四十里九溪匯而成河谷龍河在城北四十里三岔河在城北六十里舊稱水內水外者此也源出威甯由喇雍河至西堡谷龍河折而入過此爲思蠟河過平遠爲簸梁河至大定爲六歸河經黔西爲羅革河下歷清鎮爲鴨池河經修文遵義縣爲陸廣河爲烏江入思南爲德江至四川彭水縣達岷江山京海在城南五十里眾水所匯周二十五里中峙一山上建殿閣傳有龍潛此乾海子在城南甯谷司東

南水泛成湖波面甚闊雲南值旱則此水轉泛溢雲南多雨則此水轉枯涸蓋地脈互爲盈縮也雙井在城東北隅亦名雙眼泉左井水微紅右井色白甘鹹亦互異胭脂井在城東北隅白石穴出汲水炊飯色如胭脂氣候與省會同無嚴寒酷暑耕穫之期亦復相近府轄五起十三枝地方田畝肥瘠不一水田千之三四旱田十之六七無荒萊未闢之土現在成熟田一萬九千三百三十四畝有奇額徵正米二千七百一十三石有奇又徵官莊米一千二百一十一石有奇徵銀一千八百四十四兩有奇又乾隆四十二

年部議攤正差附籍漢民人丁銀一百五兩有奇常
平倉貯穀四萬三千九百五十二石四斗知府歲捐
重農穀在內義倉穀六千四百一十石有奇學額原
額歲科試皆二十名道光六年奏設郎岱廳學撥去
府學二名自道光八年科試爲始府學額進十八名
書院在城西南隅義學二駐城守營都司一員千總
一員把總二員分防舊安順州守備一員駐劄提督
一員順治十六年設駐省城康熙六年移駐安順左
營叅將一員前營右營遊擊二員守備三員千總六
員把總十二員城守營駐城兵二百一十名兵糧

由府倉支放提標駐城馬步兵一千三百一十五名
每年需糧由府倉支放一千二百六十五名餘係普
定縣倉支放今於道光十二年奉文每百名內裁汰
二名府轄所屬漢苗人戶現在有一萬九千有奇額
徵關稅課羨銀五千一百八十兩有奇場市五各有
定期均設鄉約頭人約束樹多楓杉刺楸白楊桃李
梨杏之屬近產紅花土多砂石不宜他木無銅鉛礦
廠惟有樹曰白蠟蟲樹四鄉俱有風雨調和之年其
蟲更盛一樹可收蟲二三升其蟲細如粉每一殼貯
數千頭殼大如毛栗紫紅色初夏時以稻草裹蟲數

殼置樹上蟲蠕蠕目殼出麗於枝者以萬數也遇雨則散棲葉底秋風至則雌者忽化雄者蟄入樹皮內及春啓蟄雄者背各負一殼如蓓蕾然沾雨露卽漸大鄉民以立夏後摘取之轉售湖南辰沅間楚民以其蟲散於冬青樹俟其葉盡則蟲化而樹皆蠟矣是蟲也黔育之而不能成楚成之而不能育殆遷地始爲良也苗有狝家居府南其種有三曰補龍卡尤青苗與各處同狝家居府南其種有三曰補龍卡尤青狝性皆凶悍好爲鼠竊喪不用棺男子服飾與漢人同婦人衣尚青髻蒙青布細摺長幫好樓居婚姻多

以牛爲聘喪必屠牛儂家居府東北性和平衣尚白近時有讀書入學者禮節與漢人稍同婚姻以牛爲聘迎娶之夕其女卽返母家狝家亦然至今俗亦漸革矣至於猓獯獯青苗白苗府治間亦有之其俗大概相類驛遞由縣經管餘與各郡同

論曰黔省之咽喉爲鎮遠其脊背則安順也提督駐其地內與省會爲聲援外以四鎮爲犄角因地以定制措置之密呼應爲最靈矣黔中地雖瘠民習勞苦故其爲兵者皆果銳無靡惰出入險阻馳驅林莽不必訓練而能然也他省之入伍者僅敷兵一人衣食

而止黔則物價賤無外耗一兵支食口糧其乾餉銀兩兼可贍其妻孥且挑拔之缺多故爲兵者無身家之累而有功名之志夫旣以功名爲志則恥於爲匪恥爲匪則可以使有勇而知方黔兵之勁職此之故道光十二年湖南用師提督奉

命帶黔兵一千隨同督師會勦點行之際軍中以不與者爲辱與者爲榮無幾微悵惘色及凱旋居者羨之夫人情尋常出門嗚嗚然與兒女作別其狀有不得已者今黔兵一聞徵調莫不以從軍爲樂視小醜如縛馭然斯蓋我

朝深仁厚澤固結於軍士之心者旣深且久而黔中又屢次用師其羣願效力於疆場蒙上賞而邀優恤者皆其祖父以來旣聞而旣見故其破賊之志枕戈以待非一時之激勸所能然也語曰仁至而勇生焉其斯之謂歟

郎岱同知

郎岱同知在府治西一百八十里省城西三百八十里明爲土司隴氏地

國朝康熙四年討水西酋安坤誅之郎岱土司隴安藩其親黨也復招納坤餘孽爲梗五年討平之雍正九

年始設同知駐其地其境東至永甯州界三十里西至興義府安南縣界四十里南至永甯州界三十里北至大定府平遠州界九十里東南至鎮甯州界五十里西南至永甯州界五十里東北至普定縣界一百二十里西北至安順府界六十里廣袤一百七十里城爲乾隆二十四年建周三里五分有奇高一丈三尺長六百三十丈六尺門四乾隆十九年設巡檢一員於羊場歸府管轄地則郎岱所屬也道光八年設廳學移永甯州學正駐其地學額文武各十名設有岱山書院田畝則沃野而有水源者十之四磽确

而苦旱者十之六現在成熟田一萬八千四百九畝有奇額徵正米一千八百七十九石九斗有奇徵銀二百七十三兩五錢有奇官莊租米變價銀十二兩一錢逆產租穀照夏收中米變價均解藩庫額貯常平穀一萬九千四百七十四石一斗溢額穀一百九十七石一斗歲捐輸穀二石五斗有奇道光四年增義倉六間樂輸穀一千八百五十七石五斗兵糧於正米內支放不敷之數由鎮甯撥運廳境久淪苗穴茅塞方深自雍正時改新路關荆榛置驛遞民苗始知因土所宜植桐梓桑柘之屬其苗有蔡家狝家花

苗獠獍狔五種力耕之暇兼事漁畋應役納糧久同編戶惟六月二十四日必以糯米作餌殺雞泡酒各讌於家仍其土俗轄西堡土司一員係副長官無印漢苗共計二萬五千五百三十五戶設十汛二十九塘大道六塘僻路十九塘借地安塘者四城中原駐永安營都司一員因嘉慶二年平定興義苗匪移黔西協駐於永安乃改營爲協今駐副將一員左營都司一員千總一員把總一員外委二員額外二員兵丁二百名右營守備一員把總二員外委四員額外三員兵丁二百名分防阿都汛千總一員兵丁六

十六名其地爲安南縣阿都驛分防六枝汛把總一員兵八十名分防巖腳汛把總一員兵六十一名分防落別汛把總一員兵六十五名分防永甯汛守備一員把總一員外委一員額外一員兵丁一百二十五名兵永甯州知州同駐分防關嶺汛千總一員外委一員兵丁一百二十九名分防募役汛千總一員兵七十名分防盤江汛千總一員兵六十九名分防上掛汛把總一員兵五十名分防坡貢汛把總一員兵五十五名其地卽永甯之坡貢驛郎岱驛馬五十二匹站夫一百名毛口渡馬船四隻報船二隻渡夫二

十名係郎岱廳專管修理之費係滇黔兩省各半公
捐爲滇黔孔道故也僻徑二一通水城一通平遠樅
鐵關在城西二十里與郡相接兩山夾峙最爲險要
毛口河今名西林渡雍正中總督鄂爾泰題改新路
設驛於此蓋以其氏名其渡庶後人知驛路之所由
改云

歸化通判

歸化通判在府治南一百五十里省城西南三百六
十里元爲康佐寨明爲康佐正副二長官司及鎮甯
定番廣順三州交錯之地

國朝雍正七年設營擺頂尋移駐威遠十年設通判駐
其地其境東至貴陽府廣順州界八十里西至永甯
州界八十里南至興義府貞豐州羅斛州判界七十
里北至本府界一百二十里東南至貴陽府定番州
與羅斛州判界一百六十里西南至貞豐州界二百
四十里東北至廣順州界一百一十里西北至鎮甯
州界八十里城周二里七分有奇計五百二十五丈
甃以石乾隆十三年建印山在城內松林坡在城南
梅花箐在城南九十五里康佐司東七里有擺山洞
廣七丈深不可測所屬地方曰羊場枝板當枝駝魯

黔南雜記卷四
枝魯可枝黑則枝薛家枝生苗枝紅播枝于家枝豬
場枝洛河枝共十二枝皆水下而田高全資雨澤遇
旱卽改種雜糧現在成熟田一萬六千一百八十一
畝有奇額徵正米一千三百一十五石有奇徵銀九
百二十四兩有奇常平倉貯穀一萬九千六百三十
四石有奇社倉穀二百三十一石有奇由社長經營
城中駐劄歸化營遊擊一員把總一員外委一員兵
二百一十名分防宗地汛守備一員把總一員外
委一員兵一百一十六名汛有土城克坐汛把總一
員兵二十八名擺頂汛千總一員兵四十五名汛有

石城擺羅汛千總一員兵三十五名鼠場汛外委一
員兵一十八名克孟汛把總一員兵二十六名兵糧
於秋米內支給不敷之數營員自赴道庫請領折色
學額歲科試皆一名義學脩脯由藩庫領給場市十
六處各六日而一集樹宜桐栗二種無銅鉛礦廠亦
無稅課苗有班苗花苗卜獵三種班苗男子短衣大
袴婦人服尙五色倚險爲居曰壘諸苗中之最强者
花苗又號宗地苗服尙鑲花善造藥箭卜獵女則長
裙短衣尙青藍二色通漢語各苗言語不同婚喪皆
以牛馬爲禮舊有康佐土司雍正五年裁革新闢之

區夷多漢少漢人頗知法紀夷人性皆强悍向多仇殺之事今其風漸戢耒耜之外別無生計大小苗寨通計二百七十八寨班苗二千四百八十戶花苗一千六百三十戶卜獵一千二百六十六戶無驛遞渡口有小河流入盤江北出府治爲滇黔大道南至長壩羅斛西達鎮甯均屬僻徑

黔南識略卷四終

